



Pranuar / Dorezuar Prilbena / Prilbato Received / Delivery	09.12.2020	viti god year	
Organ / Njësia Organ / Jednica Org / Unit	Nr / Pret No / Pret No / Pret	Shtojca Prilog Appendix	Sasia Kolicina Quantity
SKPM/SHCK	3040/2020		1/5



**Republika e Kosovës**  
**Republika Kosova – Republic of Kosovo**

**KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS**  
**NEZAVISNI NADZORNI ODBOR CIVILNE SLUŽBE KOSOVA**  
**INDEPENDENT OVERSIGHT BOARD FOR THE CIVIL SERVICE OF KOSOVO**

A 334/2020

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave i përbërë nga: Ardita Haxhnikaj -Demi, kryetare, Arben Mehmeti dhe Eshref Shabani, anëtarë, me Rushit Kajtazi, Zyrtar i Lartë për Bashkëpunim Profesional, në cilësinë e procesmbajtësit, ka shqyrtuar ankesën A. Nr.334/2020, të datës 27.10.2020, të parashtruar nga [REDACTED], me adresë banimi Rruga „ Lat Vaku“, Objekti C03-Krapi 2, Komuna e Prishtinës, kundër organit të punësimit Ministria e Tregtisë dhe Industrisë, në çështjen juridike “ *kërkesë nga marrëdhënia e punës* ” duke vepruar në pajtim me nenin 6 paragrafin 1 nën paragrafi 1.1 dhe nenin 18 paragrafi 1 nën paragrafin 1.1 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës dhe Rregulloren Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim, me datë 09.12.2020, mori këtë:

**V E N D I M**

- I. Aprovohet pjesërisht si e bazuar ankesa A.nr. 334/2020 e datës 27.10.2020 e parashtruar nga ankuesi [REDACTED].
- II. Obligohet Sekretari i Përgjithshëm i Ministrisë së Tregtisë dhe Industrisë që të ndërmarr veprimet e duhura procedurale të përcaktuara me legjislacionin në fuqi, për realizimin e pagesës shtesë mbi pagën bazë për kushte specifike në punë për ankuesin, brenda afatit prej 15 ditësh nga dita e pranimit të këtij vendimi.
- III. Këshilli i Pavarur Mbikëqyrës për Shërbimin Civil të Kosovës, duhet të njoftohet me shkrim pas ndërmarrjes së veprimeve në pajtim me këtë vendim.

**A r s y e t i m**

Ilir Ratkoceri, në pozitën e punës Inspektor i Sigurisë së Përgjithshme të Produkteve, në Ministrinë e Tregtisë dhe Industrisë, më datë 23.10.2020, nëpërmjet postës ka parashtruar ankesë në Këshillin e Pavarur Mbikëqyrës për Shërbimin Civil të Kosovës, me pretendimet



ankimore për kompensimin e shtesës mbi pagën bazë për shkak të kushteve specifike të punës. Ankesa e ankuesit është pranuar më datë 27.10.2020 dhe është protokolluar me numër Nr. Prot. 2288/2020.

Këshilli i Pavarur Mbikëqyrës për Shërbimin Civil të Kosovës, më datë 29.10.2020, ankesën e ankuesit e ka proceduar për përgjigje në ankesë te Ministria e Tregtisë dhe Industrisë. Më datë 06.11.2020, Këshilli ka pranuar përgjigjen në ankese se bashku me shkresat e lëndës.

Kolegji për Shqyrtimin dhe Vendosjen e Ankesave, me qëllim të vërtetimit të plotë dhe të drejtë të gjendjes faktike, për marrjen e vendimit meritator ka administruar këto prova: Ankesën A nr.334/2020 e datës 27.10.2020, drejtuar Këshillit të Pavarur Mbikëqyrës për Shërbimin Civil të Kosovës; Vendimin e datës 10.08.2007 Nr. 116; Ndryshimi dhe Plotësimi i Akt Emërimit i datës 10.02.2015; Akt Emërimi i datës 30.01.2012; Përshkrimi i detyrave të punës; Kërkesë e datës 03.09.2020 Nr. 19 drejtuar Ministrit të MTTI-së; e-mailat nga fq. 16 deri 24 , kërkesë e datës 05.05.2020 drejtuar U.D Sekretarit të MEPTINIS ; e-mailat 26-28 ; Përgjigje në ankesë e datës 06.11.2020; Ankesë e datës 13.05.2015 drejtuar Komisionit për Zgjidhjen e Kontesteve dhe Ankesave, Vendimi i datës 28.05.2015, i Komisionit për Zgjidhjen e Kontesteve dhe Ankesave; Lista e pagave; dëshmi për punën jashtë orarit e datës 02.09.2020; Kërkesë sipas Qarkorës Buxhetore 2021/02 e datës 25.09.2020 drejtuar Ministrisë së Financave, kërkesë shtesë për 2021 deri 2023.

Kolegji për Shqyrtimin dhe Vendosjen e ankesave, pasi ka shqyrtuar të gjitha shkresat e lëndës të parashtruara nga palët, ka konstatuar se ankesa e parashtruar nga ankuesi është *pjesërisht bazuar, sepse:*

Kolegji ë bazë të Akt Emërimit te datës 30.01.2012, ka konstatuar se ankuesi mban pozitën e punës Inspektor i Sigurisë se Përgjithshme së Produkteve në Ministrinë e Tregtisë dhe Industrisë.

Ankuesi më datë 03.09.2020 ka parashtruar kërkesë, në Ministrinë e Tregtisë dhe Industrisë, për njohjen e të drejtës për pagesën e shtesës mbi pagën bazë për kushte specifike në punë, ndërsa në mungesë të përgjigjes nga Ministria e Tregtisë dhe Industrisë, ankuesi me datë 27.10.2020 ka parashtruar ankesë në Këshillin e Pavarur Mbikëqyrës për Shërbimin Civil të Kosovës, me pretendimin se i takon e drejta në realizimin e shtesës në pagë për shkak të kushteve specifike në punë dhe punës jashtë orarit, siç përcaktohet me dispozitat e Ligjit Nr.04/L-186 për Ndryshimin dhe Plotësimin e Ligjit Nr.03/L-181 për Inspektoratin dhe Mbikëqyrjen e Tregut, i publikuar në Gazetë Zyrtare me datë 10.05.2013.

Lidhur me pretendimin ankimor të ankuesit për njohjen e të drejtës për realizimin e shtesës në pagë për shkak të kushteve specifike në punë, Kolegji për Shqyrtimin e Ankesave, duke analizuar legjislacionin në fuqi, ka konstatuar së dispozitat e Ligjit Nr.04/L-186 për Ndryshimin dhe Plotësimin e Ligjit Nr.03/L-181 për Inspektoratin dhe Mbikëqyrjen e Tregut, përkatësisht neni 10.A paragrafi 1 përcakton se: *"Inspektorëve të tregut i njihet e drejta e marrjes së pagesës shtesë mbi pagën bazë, për shkak të kushteve specifike në punë dhe punës jashtë orarit të punës"*, andaj, si rrjedhojë Kolegji për Shqyrtimin e Ankesave, vlerëson se ankuesit, respektivisht Inspektorëve të Tregut, sipas dispozitave të ligjit të veçantë, iu njihet e drejta e marrjes se



pagesës shtesë mbi pagën bazë, për shkak të kushteve specifike në punë dhe në këtë kuptim pretendimi ankimor i ankuesit është i bazuar, mirëpo duke u bazuar në paragrafin 2 të këtij neni ku përcaktohet së: *Shtesat sipas paragrafit 1. të këtij neni do të bëhet konform Ligjit përkatës për shërbimin civil të Republikës së Kosovës dhe Ligjit përkatës për pagat e nëpunësve civil, Kolegji vlerëson se realizimi i shtesës për kushte specifike të punës për ankuesin mund të bëhet vetëm pas aprovimit nga institucionet përgjegjëse të përcaktuara me dispozitat e Ligjit Nr.03/L-147 për Pagat e Nëpunësve Civil, përkatësisht nenin 16 paragrafi 1, ku përcaktohet se: ... institucioni kërkon miratimin e një shtese për kushte të punës për këta nëpunës civilë, sipas aktit nënligjor të përcaktuar në paragrafin 2. të këtij neni, si dhe dispozitat e Rregullores Nr.33/2012 për Shtesat në Pagë dhe Kompensime të Tjera të Nëpunësve Civilë, përkatësisht nenit 7 paragrafi 3 ku përcaktohet se ... për aprovimin e shtesës për kushte të veçanta, institucioni duhet t'i ofrojë Ministrisë përgjegjëse për Administratë Publike kërkesën që përmban: 3.1 arsyeshmërinë për pagimin e shtesës për kushte specifike të punës për pozitën (at) përkatëse; 3.2 listën e pozitave përkatëse, gradat dhe numrin e nëpunësve civilë për çdo pozitë; 3.3 detajet, sipas të cilave, secila pozitë përkatëse pritet të jetë e ekspozuar ndaj rrezikut; 3.4 koston vjetore të vlerësimit financiar të shtesave për kushte specifike të punës.*

Andaj, Kolegji për shqyrtimin e ankesave, pas analizimit të bazës ligjore dhe konstatimit se me dispozitat e ligjit të veçantë ankuesit i është njohur e drejta në shtesë për kushte specifike në punë, vlerëson se Ministria e Tregtisë dhe Industrisë duhet të ndërmarr veprimet e duhura procedurale për realizimin e shtesës në pagë për ankuesin, siç parashihet me dispozitat e nenit 16 paragrafi 1 të Ligjit Nr.03/L-147 për Pagat e Nëpunësve Civil, si dhe dispozitat e nenit 7 të Rregullores Nr.33/2012 për Shtesat në Pagë dhe Kompensime të Tjera të Nëpunësve Civilë, në këtë kuptim Kolegji ka vendosur si në dispozitiv të këtij vendimi.

Ndërsa lidhur me pretendimin ankimor të ankuesit për kompensimin e shtesës për kushte specifike të punës, në mënyrë retroaktive duke filluar nga data kur ligji ka hy në fuqi, Kolegji për shqyrtimin e ankesave, ka konstatuar së Ligji Nr.04/L-186 për Ndryshimin dhe Plotësimin e Ligjit Nr.03/L-181 për Inspektoratin dhe Mbikëqyrjen e Tregut, është publikuar në Gazetë Zyrtare me datë 10.05.2013, ndërsa ankuesi ka parashtruar ankesë me datë 27.10.2020, andaj vlerëson se pretendimi ankimor për kompensimin e shtesës në mënyrë retroaktive është i pa bazuar për faktin se ankesa është parashtruar në kundërshtim me dispozitat e Ligjit për Procedurën e Përgjithshme Administrative, ku përcaktohet se; *Ankesa duhet të parashtrohet brenda tridhjetë (30) ditëve nga data kur pala është njoftuar për aktin administrativ.*

Kolegji për shqyrtimin e ankesave, bazuar në këto rrethana, pas analizimit dhe vlerësimit të të gjitha shkresave të lëndës si dhe duke u bazuar në kompetencën e Këshillit, vendosi si në dispozitiv të këtij Vendimi.

Në rast të moszbatimit të vendimit të Këshillit nga personi përgjegjës i përcaktuar në dispozitiv të këtij vendimi, Kryetari i Këshillit ndërmarr të gjitha veprimet në pajtim me nenin 21, 23 dhe 24 të Ligji Nr.06/L-048 për Këshillin e Pavarur Mbikëqyrës për Shërbimin Civil të Kosovës, duke aplikuar edhe ndalimin e 50% të pagës mujore për personin përgjegjës, deri në zbatimin e vendimit të Këshillit.

Vendimi hynë në fuqi në momentin e nënshkrimit nga kryetari i kolegjit.

**Këshillë juridike:** Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë - Departamenti për Çështje Administrative, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk ndalon ekzekutimin e këtij vendimi.

**KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS**  
Lënda me numër A.nr.334/2020

**Rushit Kajtazi**

Procesmbajtës

**Ardita Haxhnikaj -DEMI**

Kryetare e Kolegjit



**Vendimi i dërgohet**

- Ankuesit [REDACTED]
- Sekretarit të Përgjithshëm të Ministrisë së Tregtisë dhe Industrisë;
- Udhëheqësit të Burimeve Njerëzore në Ministrinë e Tregtisë dhe Industrisë; dhe
- Arkivit të KPMSHCK-së

